



## Savjeti i preporuke (Medina)

Hatib: dr. Ahmed ibn Talib ibn Abdulhamid

27. rebiul-ahir 1443. po Hidžri / 3. decembar 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, njegov rob i poslanik, odabranik među Njegovim stvorenjima i prijatelj, i da je dostavio poslanicu, ispunio emanet, savjetovao ummet i borio se Allaha radi onako kako se treba boriti sve dok mu nije došla smrt, neka su na njega Allahova milost, spas i blagoslov, i na njegovu čestitu i čistu porodicu, njegove supruge, majke pravovjernih, njegove ashabe, iskrene dobročinitelje, i na sve one koji ga slijede u dobru do Sudnjeg dana. “O vjernici, bojte se Allaha onako kako se treba bojati i umirite samo kao muslimani!” (Ali Imran, 102) Znajte da čovjek neće upotpuniti svoje vjerovanje sve dok se iskreno ne osloni na Allaha, Njemu se preda, Njemu prepusti sve svoje stvari, bude zadovoljan Njegovom odredbom i strpi se u nevolji. Ko bude volio radi Allaha, i prezirao radi Allaha, i davao radi Allaha, i uskraćivao radi Allaha, upotpunio je svoj iman – vjerovanje. “Zato se bojte Allaha i izgladite međusobne razmirice, i pokoravajte se Allahu i Njegovom Poslaniku, ako ste pravi vjernici. Pravi vjernici su samo oni čija se srca strahom ispune kad se Allah spomene, a kad im se riječi Njegove kazuju, vjerovanje im učvršćuju i samo se na Gospodara svoga oslanjaju, oni koji molitvu obavljaju i dio od onoga što im Mi dajemo udjeljuju. Oni su, zbilja, pravi vjernici – njih počasti, i oprost, i obilje plemenito kod Gospodara njihova čekaju.” (El-Enfal, 1–4) Ako je pred vama jasna istina, znajte da ste je dužni slijediti; ako je pred vama jasna zabluda, dužni ste je ostaviti; ako je pred vama sumnjiva stvar, dužni





ste da se toga klonite, jer ćete tako sačuvati svoju vjeru i čast; ili ako se pred vama nađe pitanje u kojem su se razišli učenjaci, o njemu pitajte učene.

“O vjernici, pokoravajte se Allahu i pokoravajte se Poslaniku i predstavnicima vašim. A ako se u nečemu ne slažete, obratite se Allahu i Poslaniku, ako vjerujete u Allaha i u onaj svijet; to vam je bolje i za vas rješenje ljepše.” (En-Nisa, 59)

“Allahovo je sve što je na nebesima i na Zemlji i Allahu se sve vraća.” (Ali Imran, 109)

Znajte da niko od vas neće postići Allahovu opskrbu samo svojim trudom, i niko se neće spasiti samo svojim djelima, to su samo uzroci kojima se izlažemo milosti Plemenitog i Darežljivog. “On vam je Zemlju pogodnom učinio, pa hodajte predjelima njezinim i hranite se onim što On daje, Njemu ćete poslije oživljenja odgovarati.” (El-Mulk, 15)

Blago onome koga vlastite mahane odvrata od bavljenja tuđim mahanama, i ko podijeli višak svog imetka, i ko se bude čuvao suvišnih riječi, i ko se smiluje slabima i siromašnima, i ko se bude družio sa učenim i mudrim ljudima. Blago onome ko se pokorava svome Gospodaru, odgaja svoju dušu, uljepša svoje ponašanje i popravi svoju nutrinu. Blago onome ko pokaže svoje dobro i udalji se od zla. Blago onome ko bude postupao po znanju i kome sunnet bude dovoljan i sačuva se novotarije. Bojte se Allaha i lijepo Mu se obraćajte i molite Ga. Znajte da niko neće umrijeti dok ne potroši svoju opskrbu i dok mu ne istekne životni vijek. Ne dozvolite da vas želja za što bržim stjecanjem opskrbe navede da je tražite u grijehu, jer Allahovo dobro i blagodat postižu se pokornošću Njemu, a ne grijehom. Svaki čovjek ima svoju opskrbu koja će mu doći. Ko bude zadovoljan onim što mu je Allah dao, Allah će mu podariti blagoslov u tome, i bit će mu dovoljno, a ko ne bude zadovoljan, Allah će mu uskratiti blagoslov u tome, i neće mu biti dovoljno. Opskrba prati čovjeka kao što ga prati čas smrti. Nikome nije data veća opskrba, blagodat i dar bolji od Kur’ana, znanja i vjerovanja. “O ljudi, već vam je stigla pouka od Gospodara vašeg i lijek za vaša srca i uputstvo i milost vjernicima. Reci: ‘Neka se zato Allahovoj blagodati i milosti raduju, to je bolje od onoga što gomilaju.’” (Junus, 57–58)





O muslimani, dunjaluk je širom otvorio svoja vrata, nudi nam svoje ukrase i plijeni, svojim ljepotama, našu pažnju. “A onaj ko se bori – bori se samo za sebe, jer Allah sigurno može bez svih svjetova biti.” (El-Ankebut, 6)

Najbolji su oni koji se budu borili sa sobom, svojim prohtjevima, pa se spase, ili oni koji se budu borili na njemu, pa postignu dobro, ili oni koji se bore koristeći njegova dobra, pa budu od onih kojima će Allah Svoju plemenitost ukazati, a onaj ko se bude borio za dunjaluk, taj će nastradati. “One koji se budu zbog Nas borili Mi ćemo, sigurno, putevima koji Nama vode uputiti; a Allah je, zaista, na strani onih koji dobra djela čine!” (El-Ankebut, 69)

Neka vam dunjalučke blagodati budu samo sredstvo i ne dozvolite da se ljubav prema dunjaluku nastani u vašim srcima. Ni u jednom srcu nije se skrasila ljubav prema dunjaluku a da to srce nije iskušano s tri stvari: zaokupiranošću, čija briga nikada ne prestaje, siromaštvom, koje nikada neće proći, i nadom, koja nema kraja. Sretan je samo onaj čovjek koji daje prednost Vječnoj kući, čiji užici nikada neće proći, nad prolaznom kućom, čije nevolje nikada ne prestaju, koji daje prednost ahiretu, koji mu se približava, nad dunjalukom, na kojem se trenutno nalazi, sretan je čovjek koji udjeljuje i time usrećuje druge, a ne čovjek koji dunjaluk gomila i time sebi osigurava nesreću. Uzvišeni kaže: “A kad se molitva obavi, onda se po zemlji razidite i Allahovu blagodat tražite i Allaha mnogo spominjite, da biste postigli što želite. Ali kad oni kakvu robu trgovačku ili veselje ugledaju, pohrle mu i tebe ostave sama da stojiš. Reci: ‘Ono što je u Allaha bolje je i od veselja i od trgovine.’ A Allah najbolju opskrbu daje.” (El-Džuma, 10–11)

O vjernici, Uzvišeni Allah naredio nam je veličanstvenu stvar, pa je rekao: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56)

Allah podario blagoslov meni i vama u časnom Kur’anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

